

25/08/2000

Briged Putra ke kem tentera

KUALA LUMPUR, Khamis - Pergerakan Pemuda Umno bercadang menghantar Briged Putra pergerakan itu ke kem tentera bagi menyemai semangat cintakan negara.

Penolong Setiausaha pergerakan itu, Zulkifli Alwi, berkata selain mengikuti latihan ala-tentera, pihaknya juga bercadang mengadakan program keluarga angkat yang membabitkan ahli briged itu dengan anggota tentera yang dipilih.

"Ini salah satu daripada program penyusunan semula Briged Putra supaya ia bertambah mantap dan dapat membantu negara mengatasi masalah sosial di kalangan belia," katanya pada sidang akhbar sempena tayangan perdana filem Leftenan Adnan di sini, hari ini.

Hadir sama, Asistan Ketua Staf Perisikan Maktab Tentera Darat, Kolonel Sharom Hasyim.

Briged Putra ditubuhkan pada 4 April 1997 bertujuan mengurangkan gejala sosial di kalangan remaja. Setakat ini, kira-kira 16,500 remaja berusia antara 18 hingga 21 tahun didaftarkan menerusi 165 Bahagian Umno seluruh negara.

Sementara itu, tayangan perdana filem Lt Adnan yang akan diadakan 29 Ogos ini di Dewan Merdeka, Pusat Dagangan Dunia Putra (PWTC), akan dihadiri Perdana Menteri, Datuk Seri Dr Mahathir Mohamad dan isteri, Datin Seri Dr Siti Hasmah Mohd Ali.

Turut dijemput, kira-kira 1,000 pelajar institusi pengajian tinggi tempatan dan 2,000 anggota Pergerakan Pemuda seluruh negara.

(END)